

ಯೋಹಾನನು ಬರೆದ ಮೊದಲನೆಯ ಪತ್ರ ಯೋಹಾನಾನಿ ಲಿವ್‌ಲ್ಯಾಲ ಪೈಲ ಪತ್ರ

ವಳಕ್

ಯೋಹಾನಿ ಲಿವ್‌ಲ್ಯಾಲ ಪೈಲ ಪತ್ರ ಅಪೊಸ್ತಲ್ ಯೋಹಾನಾನಿ ಕ್ರಿಸ್ತ ಜ್ಞಲ್ಮನ್ ನಂತರ್ 50 ಆನಿ 100 ವರ್ಸಾಚೆ ಮದ್ದಿ ಲಿವ್‌ಲ್ಯಾ ಯೋಹಾನಾನಿ ಆಪ್ನುಸ್ ಲಿವ್‌ಲ್ಯಾಲ ಮನ್ವುನ್ ದಾವುನ್ ದಿಲ ನಾಹಿ. ಫನ್ ಪೈಲ ಅದ್ಯಾಯ್ ತ್ಯೊಯೊಕ್ ಯೇಸುಚಾ ಜೀವ್ವಾಚ್ ಆನಿ ಮರುನ್ ಜಿತ್ಲಿ ವ್ಹಯಾಚ್ ಡೊಳ್ಳಾನಿ ಬಗ್‌ಲ್ಯಾಲಾ ಸಾಕ್ಷಿ ಜಾಲ್ಯಾ ಮನ್ವುನ್ ದಾವುನ್ ದೆತ. ಯೋಹಾನಾನಿ ಲಿವ್‌ಲ್ಯಾಲ್ಯಾ ಪೈಲ್ಯಾ ಪತ್ರ್‌ಲ್ಯಾ ಲಿವ್‌ಲ್ಯಾಲಿ ಥಿರಿ ಯೋಹಾನಾನಿ ಲಿವ್‌ಲ್ಯಾಲೆ ಬರೆ ಖಬರಿಚಾ ಲಿವ್‌ನ್ಯಾಚೆ ಥಿರಿಲಾ ಖುಬ್ ಜವಳ್ ಹಾ ಯೋಹಾನಾನಿ ಲಿವ್‌ಲ್ಯಾಲಿ ಬರಿ ಖಬರ್ ಯೋಹಾನಾನಿಸ್ ಲಿವ್ಲೆ ಮನ್ವುನ್ ಇಸ್ವಾಸ್ ಹಾ ಆನಿ ಯೋಹಾನಾನಿ ಲಿವ್‌ಲ್ಯಾಲ ಪೈಲ ಪತ್ರ, ದೊನ್ವ ಪತ್ರ ಆನಿ ತಿನ್ವ ಪತ್ರ ಸಾಹಿತ್ ತ್ಯೊ ಎಫೆಸಾತ್ ಜೀವ್ವಾ

ಜೀವಾಚ್ ಸಬ್ಬ

1 ಆಮಿ ತುಮಾನಾ ಸಾಂಗ್‌ತ್ಯಾಲ ಜೀವಾಚ್ ಸಬ್ಬ ಪೈಲೆದನ್ವಿ ಆಸ್‌ಲ್ಯಾಲ. ಮೀ ತೇ ಕಾನಾನಿ ಐಕುನ್, ಡೊಳ್ಳಾನಿ ಬಗುನ್, ಮನ್ ಥಿವುನ್ ಗಿಹುನ್ ಹಾತ್ ಲ್ಯಾವ್‌ಲ್ಯಾಲ ಜಾಲ್ಯಾ

2 ತ್ಯೊ ಜೀವ್ ಪ್ರಕಟ್ ಜಾಲ್ಲ್ಯಾ ಬಾಪ ಆಸುನ್ ಆಮಾನಾ ಪ್ರಕಟ್ ಜಾಲ್ಯಾಲ್ಯಾ ತ್ಯಾ ಶಾಶ್ವತ್ ಜೀವಾಲಾ ಆಮಿ ಬಗುನ್ ತ್ಯೆಚೆ ಗುಶ್ಟಿತ್ ಸಾಕ್ಷಿ ಸಾಂಗುನ್ ತ್ಯೆ ತುಮಾನಾ ಸಾಂಗ್‌ಲ್ಯಾ

3 ಆಮಿಪ ಆಸ್‌ಲ್ಯಾಲೆ ಯಕಿತ್ ತುಮಿಬಿ ಮಿಳಾಯಾ ವ್ಹಯಿಸಾ ಮನ್ವುನ್ ಆಮಿ ಬಗುನ್ ಐಕಲ್ಯಾಲ ತುಮಾನಾ ಸಾಂಗ್ತಾವ್. ಆಮಿಪ ಆಸ್‌ಲ್ಯಾಲಿ ಯಕಿ ಬಾಪ ಆನಿ ತ್ಯೆಚಾ ಲೈಟ್ ಜಾಲ್ಯಾಲ್ಯಾ ಕ್ರಿಸ್ತಾಪವಿ ರಾಯ್‌ಲ್ಯಾಲಿ ಜಾಲೆ.

4 ತುಮಚ್ಚಾ ಸಂತೊಶ್ ಪುರಾ ವ್ಹಯಾ ವ್ಹಯಿ ಮನ್ಹುನ್ ಆಮಿ ಹ್ಯ ತುಮಾನಾ ಲಿವ್‌ತ್ಯಾವ್.

ದೇವುಸ್ ಉಜಿಡ್

5 ಆಮಿ ತ್ಯಚಿಪ್ಪಿ ಐಕುನ್ ತುಮಾನಾ ಸಾಂಗ್‌ತ್ಯಾಲಾ ಸಂದೆಶ್ ಕಚ್ಚಾ ಮಂಜೆ; ದೇವ್ ಉಜಿಡ್ ಜಾಲ್ಯಾ; ಆನಿ ತ್ಯಚಿಪ್ ಜರಾಬಿ ಆಂದಾರ್ ನಾಹಿ.

6 ಆಮಿ ದೇವಾಪ ಚಾಂಗ್ಲಿ ಹಾವ್ ಮನ್ಹುನ್ ಸಾಂಗಿತ್ ಆಂದಾರಾತ್ ಚಾಲ್ಲ್ಯಾವ್ ಲಬ್ಜಿ ಜಾಲ್ಯಾವ್. ಖರ್ಯಾನಿ ಚಾಲತ್ಯಾಲಿ ನವ್ ಮನ್ಹುನ್ ಸಮಜುನ್ ಯತ್.

7 ಫನ್ ತ್ಯೊ ಉಜಿಡಾತ್ ಆಸ್‌ಲ್ಯಾಚೆಗತ್ ಆಮಿಬಿ ಉಜಿಡಾತ್ ಚಾಲ್ಯಾವ ಆಮಿ ಯಕಾಮಕಾ ಸಂಗ ಚಾಂಗ್ಲಿ ರಾಥಾವ್. ತ್ಯಚಾ ಯೊಕುಸ್ ಲ್ಯೊಕ್ ಜಾಲ್ಯಾಲ್ಯಾ ಯೇಸುಚ್ ರಗಾತ್ ಆಮಾನಾ ಸಗ್ಳ್ಯಾ ಪಾಪಾತ್ನಿ ಸುಡ್ವುನ್ ನಿರ್ಮಳ್ ಕರ್ತ.

8 ಆಮ್ಚಿಪ ಪಾಪ್ ನಾಹಿ ಮನ್ಹುನ್ ಆಮಿ ಸಾಂಗ್ಲೆತ ಆಮಚಾ ಆಮಿಸ್ ಘಾತ್ ಕರುನ್ ಗೆತಲ್ಯಾಚೆಗತ್ ಜಾಲ್ತಾ ಆನಿ ಖರ್ ತ್ಯ ಆಮ್ಚಿಪ ನಾಹಿ ಮನ್ಹುನ್ ಸಮಾಸ್ತ.

9 ಆಮಿ ಆಮ್ಚಿ ಪಾಪ ಕಬುಲ್ ವ್ಹಪುನ್ ದೇವಾಪ ಸಾಂಗ್ಲೆತತ ತ್ಯೊ ಇಸ್ವಾಸಾಚಾ ಆನಿ ನಿಯತಿಚಾ ಮನ್ಹುನ್ ಆಮ್ಚಿ ಪಾಪ ಮಾಪ್ ಕರುನ್ ಸಗ್ಳ್ಯಾ ಬುರ್ಶಾ ಫನಾತ್ನಿ ಆಮಾನಾ ನಿರ್ಮಳ್ ಕರ್ನಾರ್.

10 ಆಮಿ ಪಾಪ ಕಿಲಿ ನಾಹಿತ ಮನ್ಹುನ್ ಸಾಂಗ್‌ಲ್ಯಾವ ತ್ಯಲಾ ಲಬ್ಜಾ ಕೆಲ್ಯಾಚೆಗತ್ ವ್ಹತ್ತ ಆನಿ ತ್ಯಚ್ ಸಬ್ಬಿ ಆಮ್ಚಿಪ ರಾಹಿತ್ಯಾಹಿತ.

2

ಕ್ರಿಸ್ತ್ ಆನಿ ಮಜ್ಜತ್ ಕರತ್ಯಾಲಾ

1 ಮಾಜಾ ಬನ್ದಿ ಬಾವ್ತಾನು, ತುಮಿ ಪಾಪ್ ಕರಾಚೆ ಆಂದಿ ರಾಹ್ಯಾ ಹ್ಯ ತುಮಾನಾ ಲಿವ್‌ತ್ಯೊ ಕುನಿತರಿ ಪಾಪ್ ಕೆಲತ ಬಾಪ ನಿಯತಿಚಾ ಯೇಸು ಕ್ರಿಸ್ತ್ ಮಂಥ್ಯಾಲಾ ಮಜ್ಜತ್ತಾರ್ ಆಮ್ಚಿಪ ಹಾ.

2 ತ್ಯೊ ಆಮ್ಚಾ ಪಾಪಾಂಚೆ ಸಾಟಿ ಪ್ರಾಯಶ್ಚಿತ್ ಯಜ್ಞಜ್ಞಾಲ್ಯಾ ಆಮ್ಚಾ ಪಾಪಾನಾ ತ್ಯವ್ಡಾಸ್ ನವ್ವ ಸಗ್ಳ್ಯಾ ಲೊಕಾಂಚಾ ಪಾಪಾನಾಬಿ ಪ್ರಾಯಶ್ಚಿತ್ ಜಾಲ್ಯಾ.

3 ಆಮಿ ತ್ಯಚಾ ಆಜ್ಞಾ ಸಮಜುನ್ ಫಾಲತ್ಯಾವ್ ಮನ್ವನ್ ತ್ಯೊ ಆಮಾನಾ ರವಾ ಹಾ ಮನ್ವನ್ ಸಮಜುನ್ ಗೆಥಾವ್.

4 ಯೊಕ್, ಮೀ ತ್ಯಲಾ ಸಮಜುನ್ ಗೆತಲ್ಯಾ ಮನ್ವನ್ ಸಾಂಗುನ್ ತ್ಯಚೆ ಆಜ್ಞಾಚೆಗತ್ ಫಾಲಾ ನಾಹಿತ ತ್ಯೊ ಲಬ್ಡಾ ಜಾಲ್ಯಾ ಖರ ಮನ್ವಾಚೆ ತ್ಯಂಚಿಪ ನಾಹಿ.

5 ಕೊನ್ತರಿ ತ್ಯಚಾ ಸಬ್ದಾಂಚೆಗತ್ ಫಾಲಾತ ತ್ಯಚಿಪ ಖರ್ಮಾನಿಸ್ ದೇವಾಚಿ ವೈಲಿ ಮಾಯಾ ಪುರಿ ಜಾಲೆ. ಆಸ್‌ಲ್ಯಾ ಕಾಮಾತ್ಲಿ ಆಮಿ ತ್ಯಚಿಪ ಹಾವ್ ಮನ್ವನ್ ಸಮಜುನ್ ಗೆಥಾವ್.

6 ತ್ಯಚಿಪ ಹಾವ್ ಮನ್ವನ್ ಸಾಂಗ್‌ತ್ಯಾಲಾ ಕ್ರಿಸ್ತ ಜಾಲ್ಯಾಚೆಗತ್‌ಸ್ ಆಪ್ಣು ಫಾಲಾಯಾಬಿ ಘಟ್ ಜಾಲ್ಯಾ.

ನವಿ ಆದ್ಲೆ

7 ಬನ್ದಿ ಬಾವ್ತಾನು ಮೀ ತುಮಾನಾ ಲಿವಾಚ್ ನವ ನವ್ವ ಆಂದಿಸ್ತಾವ್ಣಿ ಆಸ್‌ಲ್ಯಾಲಿ ಜುನ್ಣಿ ಆಜ್ಞೆ ಜಾಲೆ; ಹಿ ಜುನ್ಣಿ ಆಜ್ಞೆ ತುಮಿ ಐಕ್‌ಲ್ಯಾಲಿ ವಾಕ್ಯಾಸ್.

8 ಫನ್ ಮೀ ತುಮಾನಾ ಲಿವಾಚಿ ನವಿ ಆಜ್ಞೆಸ್; ಹಿ ತುಮ್ಚಿಪಬಿ ಆನಿ ತ್ಯಚಿಪಬಿ ಖರಿ ಹಾ; ಕಸ ಮಂಜೆ ಆಂದಾರ್ ಸಾಂಡುನ್ ಜಾತೊ, ಖರ್ಮಾಚಾ ಉಜಿಡ್ ಆತಾ ದಿಸ್ತೊ.

9 ಉಜಿಡಾತ ಹಾ ಮನ್ವನ್ ಸಮಜುನ್ ಆಪಲ್ಯಾ ಬಾವ್ತಾಚಾ ರಾಗ್ ಕರತ್ಯಾಲಾ ಆಜುನ್ ಆಂದಾರಾತ್ ಹಾ

10 ಆಪಲ್ಯಾ ಬಾವ್ತಾನಾ ಮಾಯಾ ಕರ್ತಾಲಾ ಉಜಿಡಾತ್ ಹಾ. ಆನಿ ತ್ಯಚಿಪ ವಿರೊದ್ ಕಾಯೇಕ್ ನಾಹಿ.

11 ಆಪ್ಲ್ಯಾ ಭಾವಾನಾ ದ್ವೇಶ್ ಕರ್ತಾಲಾ ಆಂದಾರಾತ್ ಹಾ. ಆಂದಾರಾತ್ ಭಾಲ್ತೊ. ಆಂದಾರಾನಿ ತ್ಯಚ್ ಡೊಳ ಕುರ್ಡ್ ಕೆಲ ತ್ಯನಿ ಆಪ್ಲು ಕುರ ಭಾತ್ಯೊ ಮನ್ವನ್ ತ್ಯಲಾ ಸಮಜನಾ.

12 ಮಾಯೆಚಾ ಪೊರಾನು, ಕ್ರಿಸ್ತಾಸ್ ಲಾಗುನ್ ತುಮ್ಮಿ ಪಾಪ ಮಾಪ್ ಕೆಲ್ಯಾತ ಮನ್ವನ್ ಮೀ ತುಮಾನಾ ಲಿವ್‌ತ್ಯೊ.

13 ಬಾನು, ಪೈಲೆ ರಾವ್ಣಿ ಆಸ್‌ಲ್ಯಾಲಾ ತುಮಾನಾ ರಾವಾ ಹಾ ಮನ್ವನ್ ಮೀ ತುಮಾನಾ ಲಿವ್‌ತ್ಯೊ. ದ್ಯಾನ್‌ಗ್ಯಾನು, ತುಮಿ ಬುರ್ಶಾಲಾ ಜಿಕಲ್ಯಾಸಾ ಮನ್ವನ್ ತುಮಾನಾ ಲಿವ್‌ತ್ಯೊ.

ಪೊರಾನು, ತುಮಿ ಬಾಲಾ ಸಮಾಜಲ್ಯಾಸಾ ಮನ್ವನ್ ತುಮಾನಾ ಲಿವ್‌ತ್ಯೊ.

14 ಬಾನು, ಆಂದಿ ಆಸ್‌ಲ್ಯಾಲಾ ತುಮಾನಾ ರಾವಾ ಹಾ ಮನ್ವನ್ ತುಮಾನಾ ಲಿವ್‌ಲ್ಯಾ ದ್ಯಾನ್‌ಗ್ಯಾನು, ತುಮಿ ಬಳಾಚ್ ಹಾಸಾ ಮನ್ವನ್ ದೇವಾಚಾ ವಾಕ್ಯಾ ತುಮ್ಮಿಪ ಹತಾ ಮನ್ವನ್ ತುಮಿ ಬುರ್ಶಾಲಾ ಜಿಕಲ್ಯಾಸಾ ಮನ್ವನ್ ಮಿ ತುಮಾನಾ ಲಿವ್‌ತ್ಯೊ.

15 ದುನೆಲಾ ವ್ಹವುನಿ ದುನೆತ್ ಆಸ್‌ಲ್ಯಾಲ್ಯಾಲಾ ವ್ಹವುನಿ ಮಾಯಾ ಕರುನಾಹಿ. ಕಚಾನಿ ತರಿ ದುನೆಲಾ ಮಾಯಾ ಕಿಲಿತ ಬಾವ್ಣಿ ಮಾಯಾ ತ್ಯಚಿಪ ನಾಹಿ.

16 ದುನೆತ್ ಆಸ್‌ಲ್ಯಾಲಿ ಶರೀರಾಚಿ ಆಶಾ, ಡೊಳ್ಕಾಚಿ ಆಶಾ, ಬಾಳೆವಾಚಿ ಗರ್ವಿ, ಹ್ಯ ಬಾಲಾ ಸಮನ್ ನಾಹಿ. ದುನೆಲಾ ಸಮನ್ ಹಾ.

17 ದುನ್ಯಾ ಆನಿ ತಿಚಿ ಆಶಾ ಹಾಳ್ ವ್ಹವುನ್ ಜಾತಿ. ಫನ್ ದೇವಾಚ್ ಚಿತ್ತ ಪುರ್ನ್ ಕರ್ತಾಲಾ ಶಾಸ್ತ್ರ್ ರಾನ್ಹಾರ್.

ಕ್ರಿಸ್ತಾಚ್ ವಿರೊದಿ

18 ಮಾಯೆಚಾ ಪೊರಾನು, ಹ್ಯೊ ಸರ್ತ್ಯಾಚಾ ಕಾಲ್ ಭಾಲ್ಯಾ ಕ್ರಿಸ್ತ್ ವಿರೊದಿ ಯತ್ಯಾತ ಮನ್ವನ್ ತುಮಿ ಐಕ್‌ಲ್ಯಾಸಾ ಆತಾಸ್ ಕ್ರಿಸ್ತ್ ವಿರೊದಿ ಮಿಬ್ ಹಾತ

19 ತೇ ಆಮಿಷ್ಟಿ ನಿಗುನ್ ಗೆಲ್ಯಾಲ. ಕಾ ಮಂಜೆ ತೇ ಆಮಚ್ ನವ್ತತ್, ತೆ ಆಮಚ್ ಆಸ್ತತ್ ಆಮಿ ಸಂಗಸ್ ರಾಯ್ಲ ಆಸ್ತ. ಫನ್ ತೇ ಆಮಿಷ್ಟಿ ನಿಗುನ್

ಗೇಲ ಮನ್ಹುನ್ ತೇ ಸಗ್ಗ ಆಮಚ್ ನವ್ಹತ ಮನ್ಹುನ್ ಚಾಂಗ್ಲ ದಿಸುನ್ ಆಲ್ಯಾ

20 ಫನ್ ತುಮಿ ಪವಿತ್ರ ಜಾಲ್ಯಾಲ್ಯಾಪ್ಪಿ ಅಭಿಶೇಕ್ ಗೆತಲ್ಯಾಲಿ ಜಾಲ್ಯಾಸಾ ಮನ್ಯಾಚ್ ಖರ ಸಮಾಜಲ್ಯಾಲಿ ಜಾಲ್ಯಾಸಾ.

21 ತುಮಿ ಖರ ಸಮಜುನ್ ಗೆತಲ್ಯಾಲಿ ನವ್ಹಹ. ತುಮಿ ಖರ ಸಮಜುನ್ ಗೆತಲ್ಯಾಲ್ಯಾಸ್ ಲಾಗುನ್ ಕಚ್ ಲಬಾಡ್ ಖರಲ್ಯಾನಿ ಜಲ್ಮುನ್ ಯನಾರ್ ನಾಹಿ ಮನ್ಹುನ್ ತುಮಿ ಸಮಾಜಲ್ಯಾಲಿ ಜಾಲ್ಯಾಸಾ ಮನ್ಹುನ್ ಮಿ ತುಮಾನಾ ಲಿವ್ಲ್ಯಾ

22 ಲಬ್ಬಾ ಕೊನ್? ಯೇಸುಲಾ ಕ್ರಿಸ್ತ್ ನವ್ಹ ಮಂಥ್ಯಾಲಾಸ್ ಲಬ್ಬಾ ಜಾಲ್ಯಾ ನಾಹಿತ ದುಸ್ರಾ ಕೊನ್ ವ್ಹಯಾ ವ್ಹಯಿಲ್? ಬಾಲಾ ಲೇಕಾಲಾ ನಕ್ವಾಟ್ ಕರ್ತ್ಯಾಲಾ ಕ್ರಿಸ್ತ್ ವಿರೊದಿ ಜಾಲ್ಯಾ

23 ಕೊನ್ ದೇವಾಚಾ ಲೇಕಾಲಾ ನಕ್ವಾಟ್ ಕರ್ತೊ ತ್ಯೊ ದೇವಾಚಾ ನವ್ಹ ಕೊನ್ ಲೇಕಾಲಾ ಮ್ಯಾನ್ತೊ ತ್ಯೊ ಬಾ ಜಾಲ್ಯಾಲ್ಯಾ ದೇವಾಪ್ಲಾ ಜಾಲ್ಯಾ

24 ತುಮಿ ತರಿ ಕಚ್ ಸಿಕಿವ್ಣ ಆಂದಿಸ್ವಾಪ್ಪಿ ಐಕ್ಲ್ಯಾಸಾ ತ್ಯ ತುಮ್ಮಿಪ ರಾಹುನಿ. ಆಂದಿಸ್ವಾಪ್ಪಿ ತುಮಿ ಐಕ್ಲ್ಯಾಲ ತುಮ್ಮಿಪ ರಾಯ್ತ ತುಮಿ ಸಾಹಿತ್ ಲೇಕಾಪಬಿ ಬಾ ಜಾಲ್ಯಾಲ್ಯಾ ದೇವಾಪಬಿ ರಾಯ್ಲ್ಯಾಸಾ.

25 ತ್ಯನಿ ತುಮಾನಾ ಕೇಲ್ಯಾಲ ವಾಗ್ದಾನ್ ತ್ಯ ಕ್ಯಾ ಮಂಜೆ ಶಾಶ್ವತ್ ಜೀವ್ ಜಾಲ್ಯಾ

26 ತುಮಾನಾ ಚಾಂಗ್ಲಿ ವಾಟವ್ಣಿ ಚುಕ್ಪುನ್ ಚುಕಿಚೆ ವಾಟವ ವಡ್ತ್ಯಾಲ್ಯಾಂಚೆ ಗುಶ್ಟಿತ್ ಹ್ಯ ಮಿ ತುಮಾನಾ ಲಿವ್ಲ್ಯಾ

27 ಫನ್ ತುಮಿ ತ್ಯಚಿಪ್ಣಿ ಗೆತಲ್ಯಾಲ ಅಭಿಶೇಕ್ ತುಮ್ಮಿಪ ಹಾ ಮನ್ಹುನ್ ಕುನಿ ತುಮಾನಾ ಸಾಂಗಾಚ್ ವ್ಹಯಿ ಜಾಲ್ಟಾ ನಾಹಿ. ತ್ಯನಿ ತುಮಾನಾ ಕೆಲ್ಯಾಲ ಅಭಿಶೇಕುಸ್ ತುಮಾನಾ ಸಗ್ಳೆ ಗುಶ್ಟಿತ್ ಸಾಂಗ್ತ್ಯಾಲ ಜಾಲ್ಯಾ ತ್ಯ ಲಬಾಡ್ ನವ್ಹ ಖರ ಜಾಲ್ಯಾ ತ್ಯನಿ ತುಮಾನಾ ಸಾಂಗ್ಲ್ಯಾಲ್ಯಾನಿಸ್ ತ್ಯಚಿ ರಾನ್ಹಾರ್.

28 ಮಾಯೆಚಾ ಪೊರಾನು, ತ್ಯೊ ಪ್ರತ್ಯಕ್ಷ ವ್ಹತಾನಾ ಆಮಿ ತ್ಯಚಾ ಯನ್ಯಾತ್ ತ್ಯಚೆ ಮೊರ್ದು ಉಬಿರಾಹ್ಯಾ ಲಾಙ್ಕಾಚೆ ಆಂದಿಸ್ ದಿರ್ದಾನಿ ಆಸ್‌ಲ್ಯಾಚೆಗತ್ ತ್ಯಚಿಪ ರಾಹುಯಾ.

29 ತ್ಯೊ ನಿಯತಿಚಾ ಹಾ ಮನ್ವುನ್ ತುಮಾನಾ ಸಮಾಜ್ ಆಸ್ಲತ ನಿಯತಿಚೆಗತ್ ಚಾಲತ್ಯಾಲಾ ಪರತೇಕ್ ಯೊಕ್ ತ್ಯಚಿಪ್ಪಿ ಜಲಾಮ್‌ಲ್ಯಾಲಾ ಮನ್ವುನ್ ತುಮಾನಾ ಸಮಾಜ್ವಾರ್.

3

ದೇವಾಚಿ ಪೊರ

1 ಆಮಿ ದೇವಾಚಿ ಪೊರ ಮನ್ವುನ್ ಗೆತಲ್ಯಾವ ಬಾನಿ ಕಸ್ಲಿ ಮಾಯಾ ಆಮ್ಚಿವ ಥೆವ್ಲೆ ನವ್ವ! ಆಮಿ ತ್ಯಚಿ ಪೊರ ಜಾಲ್ಯಾವ್. ದುನೆನಿ ತ್ಯಲಾ ಸಫ್ಲುನ್ ಗಿಹ್ಯಾಚೆ ಆಂದಿಸ್ ಹಾ ಮನ್ವುನ್ ಆಮಾನಾ ಸಮಜುನ್ ಗಿಹಿತ್ನಾಹಿ.

2 ಮಾಯೆಚಾನು, ಆಮಿ ಆತಾ ದೇವಾಚಿ ಪೊರ ಜಾಲ್ಯಾವ್. ಮೊರ್ದು ಆಮಿ ಕಸ್ಲಿ ಆಸ್ಲಾವ್ ಮನ್ವುನ್ ಆಜುನ್ ಸಮಾಜ್ ನಾಹಿ. ಫನ್ ಕ್ರಿಸ್ತ್ ಪ್ರತ್ಯಕ್ಷ ವ್ಹತಾನಾ ಆಮಿ ತ್ಯಚೆಗತ್ ರಾನ್ವಾರ್ ರಾವಹಾ. ಕಾ ಮಂಜೆ ತ್ಯೊ ಆಸ್‌ಲ್ಯಾಲ್ಯಾಸ್ ಲಾಗುನ್ ತ್ಯಲಾ ಬಗ್ವಾರ್.

3 ತ್ಯಚಿವ ಆಶಾ ಥೆವ್‌ಲ್ಯಾಲಾ ಪರತೇಕ್ ಯೊಕ್ ತ್ಯೊ ಬಿರಾ ಮನ್ವುನ್ ಆಪ್‌ಲ್ಯಾಲಾ ಆಪ್ಲು ಶುದ್ಧಕರುನ್ ಗೆಥೊ.

4 ಪಾಪ್ ಕರ್ತ್ಯಾಲಾ ಪರತೇಕ್ ಯೊಕ್ ಅಧರ್ಮ ಕರ್ತ್ಯಾಲಾ ಜಾಲ್ಯಾ; ಪಾಪ್ ಅಧರ್ಮಸ್.

5 ಪಾಪ ನಿವಾರನ್ ಕರಾಯಾ ಕ್ರಿಸ್ತ್ ಪ್ರತ್ಯಕ್ಷ ಜಾಲ್ಯಾ ಮನ್ವುನ್ ಆನಿ ತ್ಯಚಿಪ ಪಾಪ್ ನಾಹಿ ಮನ್ವುನ್ ತುಮಾನಾ ರಾವ ಹಾ.

6 ತ್ಯಚಿಪ ರಾಯ್‌ಲ್ಯಾಲಾ ಪಾಪ್ ಕರಿತ್ನಾಹಿ; ಪಾಪ್ ಕರ್ತ್ಯಾಲ್ಯಾನಿ ತ್ಯಲಾ ಬಗ್ಲಾ ನಾಹಿ, ಸಮಾಜ್‌ಲ್ಯಾಲಾಬಿ ನವ್ವ.

7 ಮಾಯೆಚಾ ಪೊರಾನು, ಕುನಿ ತುಮನಾ ಫಸವು ನಾಹಿ. ಕ್ರಿಸ್ತ ಕಸಾ ನಿಯತಿಚಾ ಹುತ್ತಾ ತಸಾಸ್ ನಿಯತಿಚೆಗತ್ ಚಾಲತ್ಯಾಲಾ ನಿಯತಿಚಾ ಜಾಲ್ಯಾ.

8 ಪಾಪ್ ಕರ್ತೃಲಾ ಸೈತಾನಾಲಾ ಸಮನ್ ಆಸ್‌ಲ್ಯಾಲಾ ಜಾಲ್ಯಾ. ಕಾ ಮಂಜೆ ಪೈಲೆ ದರ್ನಿ ಸೈತಾನ್ ಪಾಪ್ ಕರ್ತೃಲಾ ಜಾಲ್ಯಾ. ಮನ್ವುನ್ ಸೈತಾನಾಚಿ ಕಾಮ ನಾಸ್ ಕರಯಾಸಾಟಿ ದೇವಾಚಾ ಲೈಕ್ ಪ್ರತ್ಯಕ್ಷ ಜಾಲ್ಯಾ.

9 ದೇವಾಪ್ಪಿ ಜಲಾಮ್‌ಲ್ಯಾಲಾ ಪಾಪ್ ಕರೀತ್ನಾಹಿ. ಕಾ ಮಂಜೆ ದೇವಾಚಾ ಸ್ವಭಾವ್ ತ್ಯಚಿಪ ಹಾ. ತ್ಯೊದೇವಾಪ್ಪಿ ಜಲಾಮ್‌ಲ್ಯಾ ಮನ್ವುನ್ ಪಾಪ್ ಕರೀತ್ನಾಹಿ.

10 ಮನ್ವುನ್ ದೇವಾಚಿ ಪೊರ ಕೊನ್ ಆನಿ ಸೈತಾನಾಚಿ ಪೊರ ಕೊನ್ ಮನ್ವುನ್ ಹ್ಯಂಚಿಪ್ಪಿ ಸಮಜುನ್ ಯತ. ನಿಯತಿಚೆಗತ್ ಚಾಲತ್ ನಸ್‌ಲ್ಯಾಲಾ ಆಪ್‌ಲ್ಯಾ ಬಾವ್ಡಾಂಚಿ ಮಾಯಾ ಕರಿತ್ ನಸ್ಸಾರ ದೇವಾಲಾ ಸಮನ್ ನಾಹಿ.

11 ಆಮಿ ಯಕಾ ಮಕಾಚಿ ಮಾಯಾ ಕರಾಯಾ ವ್ಹಯಿ ಮನ್ವುನ್ ತುಮಿ ಆಂದಿಸ್ತಾಪ್ಪಿ ಏಕ್‌ಲ್ಯಾಲಾ ಸಂದೆಶ್ ಜಾಲ್ಯಾ.

12 ಬುರ್ಸಾ ವ್ಹಪುನ್ ಆಪ್‌ಲ್ಯಾ ದಾಕ್‌ಟ್ಯಾ ಬಾವ್ಡಾಲಾ ಮಾರುನ್ ಟ್ಯಾಕ್‌ಲ್ಯಾಲಾ ಕಾಯಿನಾಚೆಗತ್ ಆಮಿ ರಾಹುಯಾ ನಕೊ. ತ್ಯನಿ ಕಾ ದಾಕ್‌ಟ್ಯಾ ಬಾವ್ಡಾಲಾ ಮಾರುನ್ ಟ್ಯಾಕ್ಲಾ? ಆಪ್ಲಿ ಕಾಮ ಬುರ್ಸಿ ಆನಿ ತ್ಯಚಾ ದಾಕ್‌ಟ್ಯಾ ಬಾವ್ಡಾಚಿ ಕಾಮ ನಿಯತಿಚಿ ಜಾಲ್ಯಾತ ಮನ್ವುನುಸ್.

13 ಮಾಜಾ ಬಾವ್ಡಾನು, ದುನೆನಿ ತುಮಚಾ ರಾಗ್ ಕೆಲಾತ ತುಮಿ ಗಾಬ್ರುನಕೊಸಾ.

14 ಆಮಿ ತರಿ ಕ್ರಿಸ್ತಾಪಲ್ಯಾ ಬಾವ್ಡಾನಾ ಮಾಯಾ ಕರ್ತೃಲಾ ಜಾಲ್ಯಾವ್ ಮನ್ವುನ್ ಮರ್ನಾತ್ಪಿ ಪಾರ್ ವ್ಹಪುನ್ ಶಾಶ್ವತ್ ಜೀವ್ನಾತ್ ಮಿಳಾಲ್ಯಾವ್ ತ್ಯ ಆಮಾನಾ ರಾವ ಹಾ. ಆಪ್‌ಲ್ಯಾ ಬಾವ್ಡಾಚಿ ಮಾಯಾ ಕರಿತ್ ನಸ್ಸಾರಾ ಮರ್ನಾತುಸ್ ಹಾ.

15 ಆಪ್‌ಲ್ಯಾ ಬಾವ್ಡಾಚಾ ರಾಗ್ ಕರ್ತೃಲಾ ಖುನ್ನಿ ಜಾಲ್ಯಾ. ಆನಿ ಕಚಾ ಖುನ್ಯಾಪ ಶಾಶ್ವತ್ ಜೀವ್ ನಾಹಿ ಮನ್ವುನ್ ತುಮಾನಾ ರಾವಹಾ.

16 ಕ್ರಿಸ್ತಾನಿ ಆಮ್ಚಿಸಾಟಿ ಆಪ್ಲಾ ಜೀವ್ ದಿಲಾ ಮನ್ವುನ್ ದೇವಾಚಿ ಮಾಯಾ ಆಸ್ಲಿಸ್ ಮನ್ವುನ್ ಆಮಾನಾ ಸಮಜುನ್ ಆಲ್ಯಾ. ಆಮಿ ಸಾಹಿತ್ ಬಾವ್ಡಾಂಚಿ ಸಾಟಿ ಆಮಚಾ ಜೀವ್ ದಿಯಾ ಹವ್ನಿ ಹಾವ್.

17 ಫನ್ ಹೇ ದುನೆತ್ ಸಂಪತ್ ಆಸ್‌ಲ್ಯಾಲಾ ಕೊನ್ನರಿ ತರಾಸಾತ್ ಆಸ್‌ಲ್ಯಾಲ್ಯಾ ಬಾವ್ತಾಲಾ ಬಗುನ್ ಕನಿಕರಾ ದಾವಾಚೆ ಆಂದಿ ಶೊಡ್ಲಾತ್ ದೇವಾಚಿ ಮಾಯಾ ತ್ಯಚಿಪ ರಾಹ್ಯಾ ವ್ಹಯಿಲ್ ಕ್ಯಾ?

18 ಮಾಜೆ ಮಾಯೆಚಾ ಪೊರಾನು, ತುಮಿ ನಿಸ್ತೆ ಬುಲಿನಿ ವ್ಹಪುನಿ, ತೊಂಡಾನಿ ಸಾಂಗ್‌ತ್ಯಾಲ್ಯಾನಿ ವ್ಹಪುನಿ, ಮಾಯಾ ಕರ್ತ್ಯಾಲಿ ಜಾಲಾಸಾತ ಕಾಮಾನಿ ಆನಿ ಖರೆ ಮಾಯೆನಿ ಮಾಯಾ ಕರ್ತ್ಯಾಲಿ ವ್ಹಪುನ್ ರಾಹ್ಯಾ ವ್ಹಯಿಸಾ.

ದೇವಾಪ ದಯೆ

19 ಆಮಿ ಖರಿ ಹಾವ್ ಮನ್ವುನ್ ಆಮಾನಾ ರಾವ ಹಾ, ಆಮಚ್ ಮನ್ ದೇವಾಚಾ ಸಮಾದಾನಾತ್ ದೊಶ್ ನಸ್ಲಾನಾ ರಾನ್ಹಾರ್

20 ಕಾ ಮಂಜೆ ಆಮಚಾ ಮನಾನಿ ಕಚೆತರಿ ಗುಶ್ಟಿತ್ ಆಮಿ ದೊಶಿ ಮನ್ವುನ್ ಥರಿವಲ್ಯಾವ, ದೇವಾಲಾ ಆಮಿ ಮನ ರಾವಿ ಹಾತ್ತ್ ಮನ್ವುನ್ ಆಮ್ಚ ಮನ್ ತ್ಯಚಿಪ ಘಟ್ ಕರಯಾ ವ್ಹಯಿಲ್.

21 ಮಾಯೆಚಾನು ಆಮಿ ಮನ ದೊಶಿ ಮನ್ವುನ್ ಖಡ್ಯಾವುನ್ ಚಾಲ್ತಾಸಾತ ದೇವಾಚೆ ಮೊರ್ಡ್ ಆಮಾನಾ ಬರವಸಾ ಗಾವ್ತೊ.

22 ತ್ಯಚಾ ಆಜ್ಞಾ ಗಿಹುನ್ ತ್ಯಲಾ ಆವಾಡತ್ಯಾಲಿ ಕಾಮ ಕೆಲ್ಯಾವ ಆಮಿ ಕ್ಯಾ ಮಾಗ್ಲ ತರಿ ತ್ಯಚಿಪ್ಪಿ ಗೆನ್ಹಾರ್.

23 ದೇವಾಚಿ ಆಜ್ಞೆ ಕಚಿ ಮಂಜೆ ಆಮಿ ತ್ಯಚಾ ಲ್ಯೊಕ್ ಜಾಲ್ಯಾಲ್ಯಾ ಯೇಸುಕ್ರಿಸ್ತಾಲಾ ನಂಬುನ್ ತ್ಯನಿ ಆಮಾನಾ ದಿಲ್ಯಾಲೆ ಆಜ್ಞೆನಿ ಯಕಾಮಕಾಲಾ ಮಾಯಾ ಕರಾಯಾ ವ್ಹಯಿ.

24 ತ್ಯಚೆ ಆಜ್ಞೆ ಶಾರ್ಕ್ ಚಾಲತ್ಯಾಲಾ ತ್ಯಚಿಪ ರಾಥೊ ಆನಿ ದೇವ್ ತ್ಯಚಿಪ ರಾಥೊ. ತ್ಯೊ ತ್ಯಚಿಪ ರಾಥೊ. ಆಮಿಪ ಹಾ ಮನ್ವುನ್ ತ್ಯನಿ ಆಮಾನಾ ದಿಲ್ಯಾಲ್ಯಾ ಆತ್ಮ್ಯಾನಿ ಆಮಾನಾ ರಾವ ಹಾ.

4

ಖರ ಆತ್ಮ ಆನಿ ಬುರ್ಸ ಆತ್ಮ

1 ಬನ್ನಿ ಬಾವ್ವಾನು, ಖುಬ್ ಲಬಾಡ್ ಪ್ರವಾದಿ ದುನೆತ್ ಆಲ್ಯಾತ ಮನ್ವುನ್ ತುಮಿ ಸಗ್ಳಾ ಆತ್ಮಾಂಚಾ ಬೊಲ್ಯಾಂಚಿವ ಇಸ್ವಾಸ್ ಥೆವಾಚೆ ಆಂದಿ ತ್ಯಾತ್ಯಾ ಬೊಲ್ಯಾ ದೇವಾಪ್ನಿ ಆಲ್ಯಾಲ್ಯಾ ಕ್ಯಾ ನವ್ತಾ ಮನ್ವುನ್ ಪಾರಕ್ ಕರಾಯಾ ವ್ಹಯಿಸಾ.

2 ದೇವಾಚಾ ಆತ್ಮಾಂನಿ ಸಾಂಗಲ್ಯಾಲ್ಯಾ ಬೊಲ್ಯಾ ಮನ್ವುನ್ ಸಮಜುನ್ ಗಿಹ್ಯಾಚ್ ಕಸ ಮಂಜೆ, ಯೇಸು ಕ್ರಿಸ್ತ ಮಾನ್ವಾಚ್ ರುಪ್ ಗಿಹುನ್ ಆಲಾ ಮನ್ವುನ್ ವ್ಹಯ್ ಮನ್ವಾಚ್ ಆತ್ಮದೇವಾಚಾ ಆತ್ಮಾಂಪ್ನಿ ಆಲ್ಯಾಲ ಭಾಲ್ಯಾ.

3 ಯೇಸು ಕ್ರಿಸ್ತಾಲಾ ವ್ಹಯ್ ಮನ್ವಿತ್ ನಸ್ಲ್ಯಾಲ ಪರತೇಕ್ ಯಾಕ್ ಆತ್ಮದೇವಾಪ್ನಿ ಆಲ್ಯಾಲ ನವ್ವ ತ್ಯಾ ಕ್ರಿಸ್ತಾಚೆ ಆಡ್ವ ಆತ್ಮಭಾಲ್ಯಾ ತ್ಯಾ ಆತಾ ಲೊಕಾತ್ ಹಾ.

4 ಮಾಯೆಚಾ ಪೊರಾನು, ತುಮಿ ತರಿ ದೇವಾಚಿ ಹಾಸಾ. ಆನಿ ದುನೆತ್ ಆಸ್ಲ್ಯಾಲ್ಯಾಪ್ನಿ ತುಮಿಪ ಆಸ್ಲ್ಯಾಲಾ ಮೊಟಾ ಹಾ ಮನ್ವುನ್ ತುಮಿ ತ್ಯಾ ಲಬಾಡ್ ಪ್ರವಾದಿಂಚ್ ಆತ್ಮಜಿಕ್ಲ್ಯಾಸಾ.

5 ತೇ ದುನೆತ್ಲ ಭಾಲ್ಯಾತ. ಮನ್ವುನ್ ತೇ ಹ್ಯಾ ಲೊಕಾತ್ಸ್ಲಾ ಬೊಲ್ತ್ಯಾತ ಆನಿ ದುನೆತ್ಲಿ ತ್ಯಾಂಚ್ ಬೊಲ್ವ ಐಕ್ತ್ಯಾತ.

6 ಆಮಿ ತರಿ ದೇವಾಪ್ನಿ ಭಾಲ್ಯಾವ್. ದೇವ್ ರಾವಾ ಆಸ್ಲ್ಯಾಲಿ ಆಮಾಚ್ ಬೊಲ್ವ ಐಕ್ತ್ಯಾತ. ದೇವಾಲಾ ಸಂಬಂದ್ ನಸ್ಲ್ಯಾಲಿ ಆಮಾಚ್ ಬೊಲ್ವ ಐಕ್ತಿತ್ ನಾಹಿತ. ಹ್ಯಾನಿಸ್ ಖರ ಆತ್ಮಕಚ್ ಆನಿ ಖೊಟೆ ಆತ್ಮಕಚ್ ಮನ್ವುನ್ ಆಮಿ ಸಮಜುನ್ ಗೆಥಾವ್.

ದೇವ್ ಮಾಯೆಚಾ

7 ಮಾಯೆಚಾನು, ಆಮಿ ಯಕಾಮಕಾಲಾ ಮಾಯಾ ಕರುಯಾ. ಮಾಯಾ ದೇವಾಪ್ನಿ ಆಲ್ಯಾಲಿ ಜಾಲೆ ಆನಿ ಮಾಯಾ ಕರ್ತಾಲ ಪರ್ತೇಕ್ ಯೊಕ್ ದೇವಾಪ್ನಿ ಜಲಾಮ್ಲ್ಯಾಲಾ ದೇವ್ ರಾವಾ ಆಸ್ಲ್ಯಾಲಾ ಭಾಲ್ಯಾ.

8 ಮಾಯಾ ನಸ್ಲ್ಯಾಲಾ ದೇವಾಲಾ ರಾವಾ ನಸ್ಲ್ಯಾಲಾ. ಕಾ ಮಂಜೆ ದೇವ್ ಮಾಯೆಚ್ ರುಪ್ ಭಾಲ್ಯಾ.

9 ಆಮಿ ತ್ಯಚಿಸ್ ಲಾಗುನ್ ಜೀವ್ವಾ ಕರಾಯಾ ದೇವಾಲಾ ಆಪ್‌ಲ್ಯಾ ಯಕ್‌ಲ್ಯಾಸ್ ಲೇಕಾಲಾ ದುನೆತ್ ಲಾವುನ್ ದಿಲ್ಯಾಲ್ಯಾಸ್ ಲಾಗುನುಸ್ ದೇವಾಚಿ ಮಾಯಾ ಆವ್ಚಿಪ ದಿಸ್ಲೆ.

10 ಆಮಿ ದೇವಾಲಾ ಮಾಯಾ ಕಿಲಿ ನಾಹಿ, ತರಿಬಿ ತ್ಯನಿ ಆವ್ಚಿ ಮಾಯಾ ಕರುನ್ ಆಮ್ಚಾ ಪಾಪಾನಾ ಪ್ರಾಯಶ್ಚಿತ್ ಬಲಿ ವ್ಹವುನ್ ಆಪ್‌ಲ್ಯಾ ಲೇಕಾಲಾ ಲಾವುನ್ ದಿಲ್ಯಾಲ್ಯಾಸ್ ಲಾಗುನ್ ತ್ಯಚಿ ಖರಿ ಮಾಯಾ ದಿಸುನ್ ಯತಿ.

11 ಮಾಯೆಚಾನು, ದೇವಾನಿ ಆಮಾನಾ ಆಸಿ ಮಾಯಾ ಕೆಲ್ಯಾವ ಆಮಿ ಸಾಹಿತ್ ಯಕಾಮಕಾಲಾ ಮಾಯೆ ಕರಾಚಾ ಲಾಜಿಮಾತ್ ಹಾವ್.

12 ದೇವಾಲಾ ಕುನಿ ಕಂದಿ ಬಗ್ಲಾನಾಹಿ. ಆಮಿ ಯಕಾಮಕಾಲಾ ಮಾಯಾ ಕಿಲಿತ ದೇವ್ ಆವ್ಚಿಪ ಹಾ, ಆನಿ ತ್ಯಚಿ ಮಾಯಾ ಆವ್ಚಿಪ ಪುರಿಜಾಲೆ.

13 ದೇವಾನಿ ಆಮಾನಾ ಆಪ್ಲ ಆತ್ಮ ದಿಲ್ಯಾ ಮನ್ವುನ್ ಆಮಿ ತ್ಯಚಿಪ ಹಾವ್ ಆನಿ ತ್ಯೊ ಆವ್ಚಿಪ ಹಾ ಮನ್ವುನ್ ಸಮಜುನ್ ಗೆಥಾವ್.

14 ಬಾನಿ ಆಪ್‌ಲ್ಯಾ ಲೇಕಾಲಾ ದುನೆ ರ್ಯಾಕ್‌ತ್ಯಾಲ್ಯಾಲಾ ಲಾವುನ್ ದಿಲ್ಯಾಲಾ ಆಮಿ ಸಮಜುನ್ ಗೆತಲ್ಯಾ ಆನಿ ತ್ಯಚೆ ಗುಶ್ಟಿತ್ ಆಮಿ ಸಾಕ್ಷಿ ಸಾಂಗ್ತಾವ್.

15 ಯೇಸು ಕ್ರಿಸ್ತ ದೇವಾಚಾ ಲೈಕ್ ಜಾಲ್ಯಾ ಮನ್ವುನ್ ಕೊನ್ ವ್ಹಯ್ ಮಂಥೊ ತ್ಯಂಚಿಪ ದೇವ್ ಹಾ. ಆನಿ ತ್ಯೊ ದೇವಾಪ ಹಾ.

16 ಆಸಿಸ್ ದೇವಾನಿ ಆವ್ಚಿಪ ಥೆವ್‌ಲ್ಯಾಲಿ ಮಾಯಾ ಆಮಿ ಸಮಜುನ್ ಗೆತಲೆ. ತ್ಯಚಿಪ ಇಸ್ವಾಸ್ ಥೆವಲ್ಯಾವ್. ದೇವ್ ಮಾಯೆಚ್ ರುಪ, ಮಾಯೆತ್ ರಾಧ್ಯಾಲಾ ದೇವಾಪ ರಾನ್ವಾರ್. ದೇವ್ ತ್ಯಚಿಪ ಹಾ.

17 ನ್ಯಾಯಿ ತಿರ್ಮಾನಾಚಾ ದಿಸಾತ್ ಆಮಿ ದಿರ್ಟ್ಲಾನಿ ರಾಹ್ಯಾ ವ್ಹಯಿ ಮನ್ವುನ್ ತ್ಯಚಿ ಮಾಯಾ ಆವ್ಚಿಪ ಪುರಿ ಜಾಲೆ. ಹ್ಯಾಯೊಕಾತ್ ಆಮಚಾ ಜೀವ್ವಾ ಕ್ರಿಸ್ತ ಯೇಸುಚಾ ಜೀವ್ವಾಚೆಗತ್ ರಾಧ್ಯಾಲ್ಯಾಸ್ ಲಾಗುನ್ ತ್ಯೊ ಬರವಾಸಾ ಆಮಾನಾ ಹಾ.

18 ಮಾಯೆ ಹಾ ತಿಥ್ ಭೆ ನಾಹಿ. ಭೆ ಹಾ ತಿಥ್ ತರಾಸ್ ಹಾತ್ತ್. ಫನ್ ಪುರಿ ಮಾಯಾ ಭ್ಯಾಲಾ ಮಾರುನ್ ಪಳ್ಳುನ್ ಗ್ಯಾಲ್ತಿ. ಬಿಡ್ಯಾಲಾ ಪುರಾ

ಮಾಯೆತ್ ನಸ್‌ಲ್ಯಾಲಾಸ್.

19 ದೇವಾನಿ ಆಂದಿ ಆವ್ಚಿ ಮಾಯಾ ಕಿಲಿ ಮನ್ವುನ್ ಆಮಿ ತ್ಯಲಾ ಮಾಯಾ ಕರ್ತಾವ್.

20 ಯಕ್ಲಾ ಮೀ ದೇವಾಚಿ ಮಾಯಾ ಕರ್ತೊ ಮನ್ವುನ್ ಸಾಂಗುನ್ ಆಪ್‌ಲ್ಯಾ ಬಾವ್ಡಾಂಚಾ ರಾಗ್ ಕೆಲಾತ ತ್ಯೊ ಲಬ್ಡಾ ಜಾಲ್ಯಾ ಕಾ ಮಂಜೆ ಆಪ್ಲೆಸಂಗ ಆಸ್‌ಲ್ಯಾಲ್ಯಾ ಬಾವ್ಡಾಚಿ ಮಾಯಾ ಕರಿನಸ್ಸಾರಾ, ಆಪ್‌ಲ್ಯಾಲಾ ದಿಸತ್ ನಸ್‌ಲ್ಯಾಲ್ಯಾ ದೇವಾಚಿ ಕಸಾ ಮಾಯಾ ಕರ್ನಾರ್?

21 ದೇವಾಚಿ ಮಾಯಾ ಕರ್ತ್ಯಾಲ್ಯಾನಿ, ಆಪ್‌ಲ್ಯಾ ಬಾವ್ಡಾಚಿಬಿ ಮಾಯಾ ಕರಾಯಾ ವ್ಹಯಿ ಮಂಥ್ಯಾಲಿ ಆಜ್ಞಾ ಆಮಿ ತ್ಯಚಿಪ್ಪಿ ಗೆತ್ಲೆ.

5

ಕ್ರಿಸ್ತಾವ ಇಸ್ವಾಸ ಥೆವಲ್ಯಾಲಿ ದುನೆ ಜಿಕತ್ಯಾತ

1 ಯೆಸುಸ್ ಕ್ರಿಸ್ತ್ ಮನ್ವುನ್ ಇಸ್ವಾಸ್ ಥೆವತ್ಯಾಲಾ ಪರತೆಕ್ ಯೊಕ್ ದೆವಾಪ್ಪಿ ಜಲಾಮಲ್ಯಾಲಾ ಜಾಲ್ಯಾ ಕೊನ್ ಆಪಲ್ಯಾಲಾ ಜಲ್ಮ ದಿಲ್ಯಾಲ್ಯಾಬಾಚಿ ಮಾಯಾ ಕರ್ತೊ, ತ್ಯೊ ಬಾಪ್ಪಿ ಜಲಾಮಲ್ಯಾಲ್ಯಾ ಸಗಲ್ಯಾಂಚಿ ಮಾಯಾ ಕರ್ತೊ.

2 ಆಮಿ ದೆವಾಚಿ ಮಾಯಾ ಕರುನ್ ತ್ಯಚಾ ಆಜ್ಞಾ ಪ್ಯಾಳಲ್ಯಾಲ್ಯಾನಿಸ್ ದೆವಾಚಾ ಪೊರಾಂಚಿ ಮಾಯಾ ಕರ್ತಾವ್ ಮನ್ವುನ್ ಸಮಜುನ್ ಗೆಥಾವ್.

3 ದೆವಾಪ್ಪಿ ಮಾಯಾ ಕಚಿ ಮಂಜೆ ತ್ಯಚಾ ಆಜ್ಞಾ ಪಾಳಾಚಾಸ್. ತ್ಯಚಾ ಆಜ್ಞಾ ತರಾಸಾಚಾ ನವ್ತಾ.

4 ಕಾ ಮಂಜೆ ದೆವಾಪ್ಪಿ ಜಲಾಮಲ್ಯಾಲಾ ದುನೆ ಜಿಕ್ಲೊ. ದುನೆಲಾ ಜಿಕತ್ಯಾಲಾ ಆಮಚಾ ಇಸ್ವಾಸುಸ.

5 ಯೆಸು ಕ್ರಿಸ್ತ್ ದೆವಾಚಾ ಲೈಕ್ ವ್ಹಯ್ ಮನ್ವುನ್ ಇಸ್ವಾಸ್ ಥೆವಲ್ಯಾಲ್ಯಾನಾ ಸುಡುನ್ ಆನಿ ಕೊನ್ ದುನೆ ಜಿಕತ್ಯಾಲಿ ಜಾಲ್ಯಾತ.

ಯೆಸುಚೆ ಗುಸ್ಪಿತ್ ಸಾಕ್ಷಿ

6 ಹೊಯ್ಯ ಮಂಜೆ ಯೇಸು ಕ್ರಿಸ್ತ ಪಾನ್ಯಾನಿ, ರಕ್ತಾನಿ ಆಲ್ಯಾಲಾ. ಪಾನ್ಯಾನಿ ತ್ಯವ್ಡಾಸ್ ನವ್ವ ಪಾನ್ಯಾನಿ, ರಕ್ತಾನಿ ಸಾಕ್ಷಿ ಗೆತಲ್ಯಾಲಾ ಭಾಲ್ಯಾ ಆತ್ಮ ಸಾಕ್ಷಿ ದೇತ. ಕಾ ಮಂಜೆ ಆತ್ಮ ಖರೈಚ್ ರುಪ್.

7 ಯವ್ಡಾಸ್ ನವ್ವ ಸಾಕ್ಷಿ ದೇತ್ಯಾಲ ತೀಗ ಭಾನ್ ಹಾತ್ತ.

8 ಆತ್ಮ ಪಾನಿ, ರಗಾತ್ ಮಂಥ್ಯಾಲ್ಯಾ ತೀನ್ ಸಾಕ್ಷಿ ಹಾತ್ತಾ. ಹ್ಯಾ ತೀನಿಂಚೆಬಿ ಯಾಕುಸ್ ಮನ್ವ.

9 ಆಮಿ ಮಾನ್ಯಾಚಿ ಸಾಕ್ಷಿ ವ್ಹಯ್ ಮಂಥಾವ್, ತಸಿಸ್ ದೇವಾಚಿ ಸಾಕ್ಷಿಬಿ ತ್ಯಚಿವ್ ಶ್ರೆಸ್ವ ಹಾ. ಕಾ ಮಂಜೆ ದೇವಾನಿ ದಿಲ್ಯಾಲಿ ಸಾಕ್ಷಿ ಆಪ್ಲ್ಯಾ ಲೇಕಾಚಿ ಭಾಲೆ.

10 ದೇವಾಚಾ ಲೇಕಾವ ಇಸ್ವಾಸ್ ಥೆವ್ಲ್ಯಾಲಾ ತೀ ಸಾಕ್ಷಿ ಆಪ್ಲಿಪಸ್ ಗೆತ್ಲೆ. ದೇವಾವ ಇಸ್ವಾಸ್ ಥಿವಿ ನಸ್ಸಾರ್ಲ್ಯಾಲಾ ಲಬ್ಡಾ ಮನ್ವುನ್ ಕೆಲ್ಯಾ ಕಸ ಮಂಜೆ ದೇವಾನಿ ಆಪ್ಲ್ಯಾ ಲೇಕಾಚೆ ತರ್ಪಿ ದಿಲ್ಯಾಲೆ ಸಾಕ್ಷಿವ ತ್ಯನಿ ಇಸ್ವಾಸ್ ಥೆವ್ಲಾ ನಾಹಿ.

11 ತೀ ಸಾಕ್ಷಿ ಕಚಿ ಮಂಜೆ, ದೇವಾನಿ ಆಮಾನಾ ಶಾಶ್ವತ್ ಜೀವ್ ದಿಲ್ಯಾ ತ್ಯೊ ಜೀವ್ ತ್ಯಚಾ ಲೇಕಾಪ ಹಾ.

12 ಕೊನ್ ದೇವಾಚಾ ಲೇಕಾವ ಇಸ್ವಾಸ್ ಥೆವ್ತ್ಯಾತ ತ್ಯಂಚಿಪ ತ್ಯೊ ಜೀವ್ ಹಾ, ಫನ್ ಕೊನ್ ದೇವಾಚಾ ಲೇಕಾವ ಇಸ್ವಾಸ್ ಥಿವಿತ್ನಾಹಿ ತ್ಯಂಚಿಪ ತ್ಯೊ ಜೀವ್ ನಾಹಿ.

ಶಾಶ್ವತ್ ಜೀವ್

13 ದೇವಾಚಾ ಲೇಕಾಚಾ ನಾವಾವ ಇಸ್ವಾಸ್ ಥೆವ್ಲ್ಯಾಲ್ಯಾ ತುಮ್ಮಿಪ ತ್ಯೊ ಶಾಶ್ವತ್ ಜೀವ್ ಹಾ ಮನ್ವುನ್ ರಾವ ವ್ಹಯಾಸಾಟಿ ತುಮಾನಾ ಹ್ಯಾ ಗುಶ್ಟಿ ಲಿವ್ಲ್ಯಾತಾ.

14 ಆನಿ ದೇವಾಚಾ ಮನಾಶಾರ್ಕ್ ಕಾಯ್ತಿರಿ ಮಾಗ್ತ ತ್ಯೊ ತುಮಚ್ ಮಾಗ್ನ ಏಕ್ತೊ ಮನ್ವುನ್ ತ್ಯಚಿವ ಆಮಾನಾ ಇಸ್ವಾಸ್ ಹಾ.

15 ಆಮಿ ಕ್ಯಾ ಮಾಗ್ಗ ತರಿ ತ್ಯೊ ಆಮಚ್ ಮಾಗ್ನ ಏಕ್ತೊ ಮನ್ವುನ್ ಆಮಾನಾ ಸಮಾಜ್ಲ್ಯಾ ಆಮಿ ಮಾಗ್ಲ್ಯಾಲ ತ್ಯಚಿಪ್ಪಿ ಆಮಾನಾ ಗಾವ್ತ ಮನ್ವುನ್ ಆಮಾನಾ ರಾವಹಾ.

16 ಕೊನ್ನರಿ ಆಪ್ಲಾ ಬಾಹು ಮರಾನ್ ನಸ್‌ಲ್ಯಾಲ ಪಾಪ್ ಕರ್ತ್ಯಾಲಾ ದಿಸಲ್ಯಾವ ತ್ಯೊದೇವಾಪ ಮಾಗುನಿ. ತವಾ ದೇವ್ ಮರಾನ್ ನಸ್‌ಲ್ಯಾಲ ಪಾಪ್ ಕರ್ತ್ಯಾಲ್ಯಾನಾ ಜೀವ್ ದೇನಾರ್. ಮರ್ನಾಚ್ ಪಾಪ್ ಹಾ ಹ್ಯಾ ಪಾಪಾಚೆ ಗುಶ್ಟಿತ್ ತ್ಯೆನಿ ಮಾಗಾಯಾ ವ್ಹಯಿ ಮನ್ವುನ್ ಮಿ ಸಾಂಗಿತ್ ನಾಹಿ.

17 ನೀಯೆತಿಚೆ ಆಡ್ವ ಆಸಲ್ಯಾಲ ಸಗ್ಳೆ ಪಾಪ್ ಜಾಲ್ಯಾ ತರೀಬಿ ಮರಾನ್ ನಸ್‌ಲ್ಯಾಲ ಪಾಪ್ ಹಾ.

18 ದೇವಾಪ್ಲಿ ಜಲಾಮ್‌ಲ್ಯಾಲಾ ಪಾಪ್ ಕರೀತ್ ನಾಹಿ ಮನ್ವುನ್ ಆಮಾನಾ ರಾವ ಹಾ. ದೇವಾಪ್ಲಿ ಜಲಾಮ್‌ಲ್ಯಾಲಾ ಆಪ್‌ಲ್ಯಾಲಾ ಆಪ್ಣು ರ್ಯಾಕ್ವಾರ್. ನಾಸ್ತಾ ತ್ಯಲಾ ಹಾತ್ ಲಾವಿತ್ ನಾಹಿ.

19 ಸಗ್ಳೆ ದುನೆ ನಾಸಕ್ಯಾಚಾ ತಾಬ್ಯಾತ್ ಆಸ್ಲಿ ತರಿಬಿ ಆಮಿ ದೇವಾಲಾ ಸಮ್ಜುನ್ ಆಸ್‌ಲ್ಯಾಲಿ ಮನ್ವುನ್ ಆಮಾನಾ ರಾವ ಹಾ

20 ದೇವಾಚಾ ಲ್ಯೊಕ್ ಹೇ ದುನೆತ್ ಯವುನ್ ಆಮಿ ಖರ್ಯಾಲಾ ಸಮಜುನ್ ಗೆತಲ್ಯಾ ಸಾರ ಆಮಾನಾ ಗಿನ್ಯಾನ್ ದಿಲ್ಯಾ ಮನ್ವುನ್ ಆಮಾನಾ ರಾವ ಹಾ, ಆನಿ ಆಮಿ ದೇವಾಚಾ ಲ್ಯೊಕ್ ಜಾಲ್ಯಾಲ್ಯಾಯೇಸು ಕ್ರಿಸ್ತಾಪ ರಾಧ್ಯಾಲಿ ವ್ಹವುನ್ ಖರಾ ದೇವ್ ಜಾಲ್ಯಾಲ್ಯಾಪ ಹಾವ್. ಹ್ಯೊ ಕ್ರಿಸ್ತುಸ್ ಖರಾ ದೇವ್, ಶಾಶ್ವತ್ ಜೀವ್ ಜಾಲ್ಯಾ.

21 ಮಾಯೆಚಾ ಪೊರಾನು, ಪಾಶಾನಾಂಚಿಪ್ಲಿ ದುರ್ ರಾಹ್ಯಾ ತುಮಾನಾ ರಾಖಾ.

ದೆವಾಜಿ ಖರಿ ಕಬರ್
The New Testament in the Gowli language of India,
Devanagari script. ದೆವಾಜಿ ಖರಿ ಕಬರ್ (Bible)

copyright © 2023 The Word for the World International and Gowly Marathi Translation Samti, Karnataka

Language: (Gowli)

Contributor: The Word for the World International

ದೆವಾಜಿ ಖರಿ ಕಬರ್
ನವಾ ಕರಾರ್, 2023

The New Testament in Gowli Marathi Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

c4461ecc-9ab5-5edc-b62d-034ac186b922